



Хор: Фаина Роктымова

Шоши мир нэңхэт Дорожной карта



Хор: vk.com/popovolegshur

Хор: ЯНАО губернатор пресс-служба

Вутн яңхты нэңхэт олапсы коннысак верты ораңна дорожной карта йилаптан лэцатла. Щи ораңна Ямальской район коща хатат хуват яңхас. Аратэдна камансот хаттэл инщисман, йилап механизмат лэцатсайт, мет волаң щит убойна маты калаң нёха тын.

Алаң категория хуват маты нёха тынд нидсат ветъёң эвалт ветсат солкува моса элатла, кимет категория па сат ветъёң эвалт катсат ветъёң моса элатла. Кимет категория щирна маты нёха тын щиты артан элатты ораңна калаң нэңхэт вахсат, хонты кощайт пилна уйтантымелна.

Ищиты, олмал щирна калаң дылаң тэдна тыныта веритлат. Итта калаң нэңхэт хорасты

тахайна нятта веритта питлат. Щи порайна сохал, копадлац па солдал лувел хыщта питлат – щит пушци ищи калаң нэңхэт сэңк вахсат.

Товына нэңхэт элты мийм ветаптечкайт па йилап партонатна нятлайт, калаң нэңхэт лавты щирна – мет масты пормасат щита антамаат. Пилотной проект кимет тал педа па хыйса. Ловатдна щёрс ветсат молтас хаттэл щимац пормасатна мадайт.

«Тамац уйтантасайт сэңк вул онтас верлат, вутн ропытты нэңхэт ант веритлат масты курамна нык охалта па конторайт хуват яңхта, щитна муң щирна

яңхлу. Муң дытлу там тал убойной кампания мули йилап щирна ат манл. Щи ораңна окружной бюджет эвалт молтас ох щийщ китта маста питл – щит 330 миллион солкува молтас. Мет артан, совхоз педа ант ропытты тащат ох сытта маслат», – Ямальской район коща Андрей Кугаевский лавас.

Нявремат ищи сансна ант хыщсат. Вутн яңхты нявремат ораңна «нулевой» классат вердайт. Щи онтасна нявремат ант палта питлат ашколайна манта. Вул тахайна онтыда манты нявремат ораңна ох нятапсы верла.

Мет алаң йилап верат дорожной карта хоца мули луңан уйт

дор тылацна лоңалсайт, хонты Ямал мув губернатор Дмитрий Артюхов Антипаютинской орна яңхмална. Итта Чумовой капитал кимет няврем сэмна питтац итна мата питла. Тазовской район орна экологической уборка верла. Щи томпына студентат хой амэл-ащел вутн касдыман яңхал, онтыды ораңна сохаптам тынд талаңты парта мата питлайт. Сокалты хыщам нявремат, хой парта вуты манта дытта питл, хаттэл пормасатна па хольёң дылаң калаң лотты сертификатна мадайт.

Вера Лонгортова
хансам потар

Алтай мува яңхам няврэмат



Хор: Альбина Тырлина

Там мосванан округ экологической классан уталтыты хольмаң округ няврэм Алтай мува яңхасат. Пирыйм эвет па похат «Экологической тропа» уталтыты-сютсаяты юш хуват тутдысайт.

Кашң вош, район элты кат хоят вуйдыса. Ход экологической классатан уталтылат. Хой волонтера ул, конкурсатан, олимпиадаятан, касты тахаятан нох питам няврэмат усат. Талаң лапат эвет па похат куран, лован па йиңк хуват тутаң хопан хорам тахаята тутдысайт. Ару-Кем, Телецкой нэмпитувата, «Уч-Энмек» природной парка, Артыбаш курт пуңалан улты водопада, Черепан кева 1717 метрая нох хуңхилдысат.

Си тумпийн вератты уталтысайт, катра пормас шавиты хота тутдысайт.

Пулцават вош элты кат няврэм яңхас. Лув кутэдан ма похем ус. Лув олаң пуш симась тахаята яңхилдыс. Ясңал элты: «Шеңк хорам тахайт, туп ертаң хатлат усат. Муң унтан, атэд хотатан усув. Ар хорпи хорам тахаята тутдысаов. Манэма шеңк сама хойс, хун лован па катеран яңхсув».

Округеван 2022-мет тал элты туп Новый Уренгой па Пулцават вошцатан симась классат пуншман усат. Там хатла вет вошан симась уталтаты харат рупитлат.

Альбина Тырлина ханшам потар

Юридической нятапсы ораңна ох сохаптата ант масл



Хор: urbuo.yanao.ru

Ямал мув шоши мир нэңхэт эдты юридической нятапсы ораңна ох сохаптата ант масл. Хон мув па Ямал мув Законодательство хоца щирл список лэщатса, хата вантта рахал мала хорпи категория нэңхэт ши лоңалсайт, па мала хорпи вер пидна таром нятта пилдайт.

Щиты, Ямал мув шоши мир нэңхэт таром маты юридической нятапсы хоца лоңсат.

Государственной юридической бюро 2023-мет тална 516 шоши мир нэңху эдты нятсат, 2024-мет тална па нийд тылащ сис холна 313 нэңху.

Нэңхэт мета маса вер пидна ёхтыдысат, хой пенсияйд атмаш

лэщатса па туңматты ораңна, хат нэпекдал лэщатта, хой хатна маты ораңна, няврем охат лэщатта па па верат пидна.

Вутн яңхты па худ велты нэңхэт эдты юридической нятапсы ясна пайтты кон ораңна, Государственной юридической бюро выездной приём верл, емаң хатлатна ропытлат.

Ши томпына, похлатна олты нэпек луңатты хататна видео-конференц-связь щирна нятлат. Ши ораңна масл нэпек луңатты хатна манта, щита ропытты ныңат Юридической бюро хоца ропытты нэңхэт педа ясаң китлат па лавда, мала хатлна па мала щёсна йита масл. Щита касаң нэңху ораңна Ямал мув Государственной юридической бюро хоца ропытты адвокат устной па нэпека лэщатам консультация малат, заявление, жалоба па ходатайство ханста веритлат.

Мет ямас юридической нятапсы верат пушци дырамтты ораңна, масл Государственной юридической бюро Колл-центр телефон номер хуват инщиста 8-800-101-98-75 па <https://urbuo.yanao.ru> сайт хуват заявка китта па нэпекат лэщатта.

Вера Лонгортова
эщатсаы

ОБЪЯВЛЕНИЕ

СЛУЖБА ПО КОНТРАКТУ В ВС РФ

ПОЛНАЯ ИНФОРМАЦИЯ ПО ТЕЛЕФОНУ 8(902)81-6-11-90

ЗВОНОК ПО РОССИИ БЕСПЛАТНО

ВРЕМЯ ДЛЯ ВАЖНЫХ РЕШЕНИЙ!

КОНТРАКТНАЯ СЛУЖБА

5 000 000 Р

ЕДИНОВРЕМЕННАЯ ВЫПЛАТА

2 300 000 Р

ПРИ ЗАКЛЮЧЕНИИ КОНТРАКТА НА ЯМАЛЕ

Присоединившись к другим регионам, вы сможете работать на границе от места проживания до г. Салехард. В период оформления прохождения в г. Салехард бесплатно, за рубежом бесплатно.

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р

400 000 Р

до 120 000 Р

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ ОТ 210 Т.Р.

СЕРЖАНТ ОТ 232 Т.Р.

ПРАПОРЩИК ОТ 292 Т.Р.

НКО эдты нятман

Пулцаватна некоммерческой организацияйт ораңна семинар манас. Лув онттыды марафон «Гранты Ямала» онтасна верса «Подготовка к участию в грантовых конкурсах 2025 года» тема хуват.

Щита вул кощайт, НКО представителят, проектной команда нэңхэт, федеральной па региональной грантовой конкурс педа киттытат уйтантысат па онттысат.

Хатл сис «Время твоей идеи» практикум мантсат па «Я-эксперт» ентапсына ентсат па тестат хансат.

Ши семинара Светлана Данковцева па Елена Измайлова ропытсаңан.

Вера Лонгортова хансам потар

Ай куртатан улты худ, вой велты ёх



Хасям лапатан Пошты курта па Ащави курта яңхсам. Сита улты ёх пидан уйтантысам. Хоты ханты хоятлув ай куртатан улдат, ханты улапса вантсам.

Ешаул Саңхамкуртан, Поштыкуртан па Ащавикуртан улты хоятат луңан худ велпаслаты пандал эдты тал курталада касалдат.

Ин па, луңан па сусан, хопан манты кум порайн, Доркуртан па па вошатан па куртатан улты хоятат, энмам мувдала порылыты яңхлат, рутдал нумалмилат.

Кашң пуш самем аматал, хун симась тахаята яңхдам. Там порайн па ялап вер, сита улты тахайт Кунавт



Хор: Альбина Тырлина

Заказника луңтаслат, сисан нэпекды тохи ант эсалдайн. Манты ки лэсытылан, нэпек тайты мосал. Муй нэмпии хопан, муй номер тайл па муй арат хоят манал, иса сита ханшман ат ус.

Си ай куртатан шах шимал хоят хасяс – ит, кат хоттэд. Елды педа, сита улты ёх, тумтака уллаты, тал сисан велпаслаң ат ул.

Альбина Тырлина ханшам потар

Доркурт 80-мет тадал постас



Хор: Фаина Рохтымова

Хасям сютсыты хатлатан Доркурт хоятат куртгэл 80-мет тадал постасэл. Куртаң па мойң ёх каш верты хотан уйтантысат. Мойң хоятат вохилдысайт: Валентин Вальгамов Пулцават вош, Яна Шкатуляк Горка вош па Наталья Кузьминична Паршакова Катравош элты арыты ёхтылдысат.

Сикуш ертаң хатл ус, хоятат ёхтылдысат, тынасты харат дарпитысат: вонсямотаң па худаң нянят понылдысат, верам пормасат эталтысат. Няврэмат лув па аңкидалан лэсытам лэтотат тынысат: худ, нохар, вонсямотат, арсыр шарытам

нянят. Каш верты хотан рупитты хоятат каш лэсытсат: садика яңхты няврэмием, уншак эвет па похат мойлапса ясаң китсат, Лидия Паршакова, Ольга Отшамова, «Кунават нэ» па «Родник» нэмпи группайңан арысат.

Си хатадан Доркурт куся ху Сергей Иванович Петров куртаң па ёхтам хоятлада ар ям ясаң ястас. СВО хося улты хоятлув нумадмисат, нялхосьяң тада ювам няврэмат паспортан масайт, яма рупитты ёх, ар хорпи касты харатан нох питам

хоятат па ГТО яма мийм ёх грамотаятан па мойлапсаятан мойлаптасайт.

Хатл кутапан худ кавартсат, эплаң хошъяйиңк йинсьсат. Саккараң нянят каврам шай пидан йинсемисат. Хоятат ям номасан ёхи мантсат, самлаң аматсат. Па емаң хатлэл унты куртгэл мет хорамаңа ат йил, аршак хоят ат ёхтылдыл, хоятлаң тумтака ат улдат.

Альбина Тырлина ханшам потар

Курт кутапан ур хот омасса

Катравош куртаң ун хоятат хуван тайм нопсэл вера тыйс. Там мосты верэл лэщатты, ёша пайтам Губернатор грант ох шеңк ун нётапса верас.

Щи тумпийн, «Ямал-потомкам!» Ассоциация Приуральской филиалан рупитты хоятата

па ун мойлапса ясаң китдат. Грант шитты касапсая лоңты ураңан, нэпек ханшты вер хоща нётсат. Тамиты яха пидтащман, «Катравош курт: катра вош дэрат» этнокультурной проект тыйс. Нэпек рупата етшам юпийн, ин куртаң мохет вош кутапан ур хот омассат.

«Едпи уйтантопсайт удлытэлан, вошаң хоятлув каш верты хота, тухал ишан ашкудая ёхтылдысат. Ур хот опсам юпийн хоты ям. Емаң хатлатан уйтантатыйн, куртаң ёх хар тахайн актащлат, ермат антом. Мойң хоятата па няврэмата уталтыты вантопсайт хот дыпийн лэщатты рахал, экскурсияйт туты. Хот пуңадан касты хар дарпитты, ёнтты, навратдыты. Ун хоятлув па тата яха актащлат, потрэмадат, вератлат.

Грант щиран шитты ох, щит шеңк ям вер. Нётапса куман вер ед хатмал. Там верэв сохнам юпийн па елды рахал номас понты. Куртаң хоятлув кеша молты ям вер па верты», – Катравош куртаң ашкудайн ханты ясаң туты уталтаты нэ Лидия Анатольевна Сметанина (Назарова) ястас.

Зоя Куртымова ханшам потар



Хор: vk.com/priuralye

Дорвош район юраң эвие

Там ванан, Орёл вошан, нэчат кутан щакилдыты вер касапса манас. Хон мувев нялъяң регион элты хуламсот пела хутъяң нэ тохи ёхтас. Ямал мувев эталтаты Анна Рохтымова яңхас.

Дорвош районан, Анна, щак утша щакилдыты веран юращад. Лув «Орлан» клубан худмет тал туп тамащ касапсаята лэщатыйл. Алексей Родионов па Сергей Крутов щи вера лувел уталталдан. Верты верал яма тыйл. Ар пуш олаң мейтайт вуйдыс.

«Осенний вызов-2024» касапсайн Анна худмет местая этас. Хуламсот молтас волаң, юраң нэчат кутан щит шеңк ям рупата. Тамащ нох питты тахайн щёмаң хоятта удты мосал па так номас тайты.

Муң па Дорвош район эвева мойлапса ясаң китлув. Тумтак ула, касты верэн елды туви. Кашң касапсайн, мойлапса матыйн, курэн олаң норма ат пурмал.

Зоя Куртымова ханшам потар



Хор: vk.com/popovlegshur

6+

ДУХ АВТ
газетая

ханшлтантыты

Щёхар тылащ 1-мет хатл вуш элты газетаята па журналата 2025-мет тада подписка нэпекат лэщатты пора ёхтас. Кашң куртаң па вошаң почтайн ДУХ АВТ газетая рахал ханшлтантыты. ДУХ АВТ газетайн рупитты хоятат вошат па куртат хуват потар каншман яңхлат, па лаңхаты хоятат газетая ханшлтаты верытлат. Щишан муңев ханшаты, телефон 8 (34922) 4-68-63 хуват ясаң вераты. Муң нын пиданан уйтантылув, потар па хор верлув. Щи юпийн арадал мир вантты ураңан ДУХ АВТ газетая пондэв.

Ишакман тайты лэтотат



Давантысты нын па холща Велци нёхрам потам худ? Хошам нялмен потам велци Хун па хойда одаң пулн?

Р.Ругин «Потам худ»

Ипуш ма омассам ун антем хоща, нэпек (журнал) луңатсам. Ад улты каша «Финский лэтот верты хот рецептат» потра педатсам. Сита ханшман ус, хоты вуды нёхи элты лэтот каварты мосал. Ма нумассам, хантэт хоща ищи анта шимал ар хорпи лэтот ул, па лув вуды нёхи элты верты лэтот ищи самаңа тайлат. Ай тэдан нумилмилэм антем па ун антем верам худ вой эпал, эплаң шуммах эпал, камн пуш ун антеман уңалан долты хорпи хулаң нянян мийдысаюв.

Щиты ма номасан ёхатсайм: яма уятты лэтот элты, муй щиран ханты хоятат каварлат (верлат) ант ёрэматы эплаң, латаң лэтот. Муң уятлув, ханты хоятат яма самаңа тайлат тамащ лэтот: вуды нёхи элты лэтот, тохлаң войт элты каварты лэтот, худ па рых элты верам лэтот. Овас мув хоятат ант верытлат улты вуды нёхи таклы. Вуды нёхи – щит мет хоята рахты лэтот: лув анта вояң, вуды лэ́ сыстам лэтот – нёта, па щалта вуды нёхи ар витамин тайл. Щалта кимет ям эплаң лэтот Асан улты хоятат тайлат – щит худ. Худ рахал лэты каварман, шарытман, нярхуда, потам худа па содаңа. Ма ай тэдан вантсам, хоты антем па ун антем муңев, няврэмлада па

хидыла камн хорпи лэтот каварсатан. Ма дынан инщассалдам па нэпека ханшсалдам, хоты мосал ханты лэтот лэщатты. Тата ма каматса лэтот элты потардам.

Няр нёхи

Там йисан Овс муван улты хоятат ишакман тайлэд тамащ лэтот – щит няр нёхи. Ма улам ветсот-лапатсот грамм потам нёхи, сол па перец. Потам нёхи сэварлэм ай шупа, щалта нёхи пулат картана пондалам. Картан пуңда сол омаслам, перец. Щи эплаң, уңалан долты нёхи рахал лэты.

Сорам нёхи

Тащан яңхты хоятат шеңк ишакман сорам нёхи тайлэд. Яна щи, сорам нёхи хоят йи пуш ки давантыяс – ант ёрэмалды. Ма вудам няр нёхи – кила кем, сол. Ай эплаң няр нёхи пулые вудам. Ваща эватлэм, щалта солан нёсытлэм па каматса щёса хайлэм. Щалта нёхи ким кела тахарлэм, лув яма найн па вотан ат дойл. Щиты нёхи каматса хатл мосл

к а м а н



Хор: Зоя Кургумова



Хор: Альбина Тырлина

каварлэм. Щалта ма сортыем хувана хонлэм, хошгыйиңкал хащал па ана хонлэм. Хошгыйиңка рахал приправа эсалты.

Шумах

Луң порайн, хун худ холпа яма хойл, рахал шумах лэщатты. Худ элты сом, нёхщамат, судат нох вудам. Щалта худ шаншал хуват эватлэм, па худ нёхел шуматлэм. Худ ким най хоща тахарла. Хун худ яма сорал най ещал, нох вула па щи рахал шарытты па лэты.

Худ вой

Ун антем верты эплаң худ вой умащ лэты. Лув манэм тамиты альсалды худ вой верты щир. Вулам яң вояң шёхар, сол. Худ шупа эватла па ун пута понла, худ элты йиңк понла. Шёхар мосал ай тутан каварты, щалта нох вуты, ат айшукие дойл, щалта нумалта вой вуты. Па щалта худ элты вой кев пута понлат, хус минут кем каварлат. Нох вулат па тынаң кев хошапа худ вой понлат. Нянь пилан худ вой щикем эплаң.

Тамащ ям лэтот хантэт тайлат. Лэтот верты щират елды туты мослат. Ма нумастэман, шеңк лудан ям ус – Пулцават, Лапатнаңк, муй па Суматвошан лэты хотат усат лудан па тамащ нэман «Ханты содамат», «Шумах», муй па «Ханты лэвапса» понты рахас.

Мария Рохтымова
ханшам потар

Няр худ

Вудам няр худ – ветсот-лапатсот грамм, сол па перец. Няр худ лэщатлам сарах элты, рахал па рут худ вуты.

Потам худ

Улам потам сарах, кутлап доват. Ох, дый па торх эватла. Щалта худ туңа донщда, кешиян ваща эватла. Потам эплаң вояң сархие ващ шукат лэдайт сол пилан.

Хошгыйиңк

Елды потар манал хошгыйиңк элты. Ма вулам эвтам сорт па кев пута каварты понлэм па ай шукие солан эсаллэм, кев путэм ратхара тахартлэм па

Канащ пухлаң ёх улапса

Щирэмна велпаслаты питсам

– 1968-мет тал. Хутхошъяоң тал усам. Ма алаң рупитты питсам.

Омэм посалас. Омэм посаламална манэм хутхошъяоң тал ус. Ащем пидна илэм тал ма рупитсам. Щи олаңна хоты яңхылыдам, ал лэллидаям, моса нётдам тоңха. Харсоямна ундтысам. Юхат рупитты питсам. Ащем хув ант ус, посалас.

Щи порайна щирувна хыщсув. Вуд ат юканы ма хыщсам. Ма эвалтэм вуд яй тайсам, яйм посалас. Хопна манмел тахайна йиңкна посалас. Век уцилдыам антам.

Елащ ундтыта ма вохылыдаям па ант лытсам. Юхат юраңи ювмем юпина вохылыдаям, ма ант лытсам. Манэм сук ус.

– Итта наң ант рупитдан, наңен Асэн такды каслы па щукат ант ул?

– Щукатсак щи. Хоты верда? Итта давты сук. Алаңсахатна вет щёсна ма нох вердалам, нык мандам, Ас сылна сусылыдам. Там нэңхы манмал, том нэңхы манмал.

Хопам вантлэм, няврэмлам ант ки мантсат, ма яра мохты мандам. Щилта нык мандам, няврэмлам манмел ки, хопевна. Кат йикам. Итл Слава, итл Тимофей.

– Ның тайлаңан?

– Вуд атл, Славайл ныңал ол. Ай атэм итта ундтыта манас. Лув зооветтехникумна ундтыял.

Там йис худ велпаслаты вер эват

– Наң щирэнна номас вусан нопталгыты вер эват волыттый? Мола ураңна наң волысан?

Там потар вет тал сайн хансылдысэм. Никон Николаевич Куйбин арадал миран яма уйтла. Лув потартыйм потардал елпи этам газетаята поныдысдув. Хоятатан луңтыдысаят, ям ясаңан астыдысаят.


– Там йисна йина щукаты йис худ велты улапса. Ханты ясаңна лавман щи ханты худ мохсаң, щёхар сымдамас, вунс велты аратыта питса. Катра щи худат велты рахам порайна кас улта.

Путы худ антам кепа: паниңен молаен антам кепа, том худат велты пора хыщл. «Настроение» июлты ул. Итта па том худ ант велты, ущ ёхтас, щи, худан велты ант рахл. Ант ущлат мола верты?! Паниң сук еса велсат, Асна па худ антам.

Хой пасак тахайна манл рыбнадзор лавад: «Наңен ант рахал тата велты. Там наң «местаен» ант ул. Мана па тахайна. Щиты сахат, манэм-

на сэңк щукат хорпи.

Ма хол хоты хув манты ант верытдам. Во сна яңхты умащ ус. Катрасак яңхылыдам. Итта анта. Пухадна век



Хор: dzen.ru



Хор: Зоя Курганова



усам, аса ма нэңхыдам. Ким этлам: няврэмат улдат, хой пидна аса потардан, мола. Тюменьна хотна масаям, кат пус яңхсам па щи, омасал. Тата вохсам, ант масаям.

Мола такалдыйи лэпалтыты нэңху... Хата ма мандам, манэмна июлты хол мандам, ма

«мешаятдам». Ма «чувствуетлэм» манэм щиты. Ма щиты нумаслам. Манэм тухал порайна йэдэм. Ёхатдам па нэмаса ант хастэм хорпи. Аса рупитлат.

Давидыдам мохыдам педа: «Па йисам, ма тата «мешаетдам»». Щи кут нэңхы лавад: «Юва, юва муң хоцаев».

Метсам. Итта мола юңкем тонна велты луң манман.

Муң катра сэңк артан веллидув. Худам тал холна антам сыс пятилетний план там Асна тукапталэв!

Дар ант тайлув. Муң ряпушка артан велдылув. Яңхылысув Белоярскна. О-о-о! Щи порайна брандвахтайна 1 октября лэлдув бригадайна. Нил-веткем нэңхуй талта вудам, манлув ряпушка велты. Ёханал потла, мохты омадалув.

Щи рюжаят омадалув. Щи арат ряпушка! Хатал кутапна ёхатдалув, хатал кутап юпина па тэд лоңты 100 - 120 тоннайн. Ям порайт щи усат, хулаңат.

Герман Наков
хансам потар



Хор: Вера Лонгоргова

Манэма вуйм олаң войием

Там потар Александрина Яковлева ханшас. Ин арпелак хоятат ёлан тайты войт вуйдылат. Ампат па катет тумпийн турамсот хусаң вой няврэмат тайты даңхалайт. Нын муңева ищи ханшаты, муй хорпи войиет нын ёлан тайлаты.

Криза нэмпи черепахаем. Хоты хотан версэв па худан дапатсэм.

Хун муң Кризаев вусэв, мохты нумасты питсув, хота лув улты питад? Даращан, ертэпаң хошапан, муй па хот хуват ад шушилдыл? Муң ант верытсэв лувел хотды хайты, хоты сахат лув лыпаща яңхты питад? Кризаев ушты верытал!

Лув антом куш хашаңа, туп ищипа, аквариуман лувел ямшак питад! Аквариум? Яна щипа! Щалта, муң черепахав, лув ёра хот тайты питас! Ин лув паты хот хуват вольняя ант шушилдыл. Щалта муң лув акариумад хорасэв, па щикем яма йис. Ма нумаслам:



Хор: Аллина Тоярова

«Я-а, лув хотыел ма хотэм элты хонна ямшак!»

Юхат, муң лув давантыты андал дэтотан тэкаптаслуд. Ма па вантсам, хоты лув дэд. Худам хатл хащас, ма номас понтсам лувел худан дапатты. Щикуш палдысам, хотащ ант ат йил. Лув худ пулад дэслы. Тумтака хащас, ант халас!

Туп ищипа муң лувел вой леккар хоща тутдысэв. Лув муңев ястас: «Иса ям, нэмолты волаң вер ант тыйс!» Щалта ястас, муйн даптыдыты мосал, войием мушаңа ант йиты ураңан.

Муң лувел ёхи хотала тусэв. Тамеман потрэм етшапталэм.

Допанты муй допата?

Кашаң ханты хоятэв лув потарты щирал ванан тайдалды. Еланшак улты хантыдал па щиран ки потарлат, мохты нумасал: «Щит муй лэңкет? Потарты век ант хошлат». Щит, лув энмам мувал, ванан улам хоятдал элты дойд.



Хор: dzen.ru



Ма, энамты нэңа удмеман, ищи щиты нумасам. Хун Пулдавта рупитты ёхатсам, «Щёпр Авт» студияйн Леонтий Антонович Тарагупта пилан рупитты питсам. Радио хуват этты потрат дэщатсув. Ад потрат тумпийн, монщат, арат, йис потрат эслысув.

Щи тумпийн партыдыслы ай потрат ханштыя. Хота 7-12 предложений элты талаң хор ат ныса, талаң удапса. Мет олаңан давартшак ус щимащ ай потрыет ханштыя. Юхат уталсам па, щикем ям. Каматса ясаңан

Ар пелак ханты хоятат там тылщев щёхар тылща аялдел. Ванты, артан щёхар холпа хойл. Щёхар дытап тал сыса сопасдала. Там йисан лув элтайл шумах верла, хулвой палда. Катра пораятан хоты сух, мохсаң па вунш элты артан верыдыса.

Щи тумпийн хойм лыпта па аялтыда. Суса йил па лыптит ищкийн хойлайт, потлайт па ил щипитлат. Турмев тал пела кердал. Тал куртата, хот волате касалты порая щипит. Ин, там хатлатан, ар пелак нопталты ёх луң пораял щипитшапталэл.

Герман Романович Сандрин ясаң щиран «Хор оңат нэрти



ханшман, яна, матты ки, талаң мир кашдалсан!

Йи порайн допанты элты ханшсам. Ин волаң ант нумлэм, муй щипотрэман ус. Таңха, хоты луңан лув муң нопталты Хишпанэван пурдыдысат. Хорамел ад па ищи тый тэвалсэм, хойн вантса? Мосаң па, сух допанты элты ханшилдысам?

Аспохем икийн луңатты питаман, ястал: «Муя па допанты? Допата. Щиты мосал ханшты!» «Антом, ма щиты ант ханшлэм! Муң хощаев – допанты! Муң Кунават мувеван иса щиты потартыла. Допата – щит муй картсар?»

Катра порайн ун хоятлуд элты молты ки инщисув, лув муңилува потартысат: «Уна йилан, моштадэн!» Яна щипа, хун щипа вер элты иса нумаслан, тыел-тохел номпсэн поныдылэн. Молтыя ошешащэн йил. Ант ки нумаслан, щиты олы-молыя хашдан.

Щипа веран, кашаң хоят уна пелка йиталан мув доваталан вантты питдалды. Ант ермал туп лув рутал потарты щира. Лув пуңдалан улты ханты мирыел ясаң иса моштадды, уйтдалды. Щишан ин, куш Кев леп ханты, Касам ханты, Халэват Пелак ханты пилан ма потрапсаеман потарлам, лув па лув потрапсаелан потарлат – иса ошаң.

Щишан, нын ищи, аратал хантылуд ясаң ванан таялан. Вецката, шащаңа удаты. Тумтак ёшан, тумтак куран!

Щёхар тылащ



тылащ», щиты щёхар тылащ вулэң ёх кутан аялда. Хоят вантса, муй вер пела ул, щипа вердал хуват тылащдал нэматдалдал.

Мосаң нын уятлаты, хоты там тылащ па аялтыда? Щит элты муңева ханшаты.

Ёхан Мув Ики па Ас Мув Ики



(Йис потар)

(Олаң шупал № 38 (1237) лунталн)

Пупел умы-
ман си шушмас.

Ёхи си ёхтас ики лэcki. Ёхи ёхтас па ийимел си шушал.

– Йи икен па?

– Ма нэмоқты ант уйтдам. Лув унтан хасяс.

Па ин икен имуйд хоты йис? Няврэмдал яха ёнтты ант эсалдалды, юхаң ёшан катна нюхалдалды. Имеңалал яха потарты манлаңан, манал – катна нюхалдалды, уван аламдалды. «Там ики па муй куль, имеңалал нумаслаңан, – а хоты йис? Йи икел антом».

Я си, кимет икел хув яңхас, ван яңхас, си, ёхи ёхтас. Йи икел хося па потарты ант шушал. Молтэл вевтам, си ики иса вевтам си хораспи.

Щиты суса йис, нохрат етшасат. Ас Мув Ики йи икел хося шушас па ястал:

– Хопламан уңхлад холасат. Хопламан лэсятты уңх каншты яңхламан!

– Я, ма хоты, кашды.

– Щи куман па ястал, – я мандаман!

Вера вохты питса хоты, вера яма усңан, си мантсаңан. Си шушмасңан.

Си шушсаңан, си

– ...саңан, унта ехатсаңан.

– Па там, уңхиет там си, па тата воңхламан.

– Анта, ма туңял удтэман, шушилдытэман-са, туташак иса ям уңхиет: кар антом, нэмоқты антом!

– С и

мантсаңан,

мантсаңан, ас

мув икийн щи

туса, щи туса,

ёлта си лонсьлдтаса.

Йи нохар юх есялт, нувдал иса порхал вуш элды нуваң! Си хораспи ун нохрат тайл!

– Па уңх сяха

воңхламан! Наң

тый, нох хуңхилды!

Ин ёхи ёхаттэманан, няврэмламан амтатлдыты ям нохрат, – нохрат ид воськалди! – Ас Мув Ики ястал.

Ин икел сикущ кашды ус.

– Мана я, хуңха!

Ин икел нохар юха нох хуңхты си питас.

Нохар юх кутап кема туп ёхтас, йи икелан ёлта си тула. Ёлта тувман, олаң икел нох водыйс.

– Па наң ки йидан, ма илды керладам.

– Анта, мана, мана юх тай унты хуңха!

Ин ху юх тай унты си нюхалса. Иса ёлта туса.

– Ин па талта илды эсламта!

– Па талта илды эслапман, хатнэхуя па хун йидам?!

– Анта, анта, эсламта! Ант ки эслапдан, ма наңен талта илды си воськалэм!

– Я, мана, ал воськи – ситы ки, эслапдам. Наң воськалэн

ки, шомо охаң сирн питдам, сита сях пелдайм, сита си пардам.

Хоты нэрыты, ин Ёхан Мув Ики си эсламтас. Ид питас.

Тя-а, хулдалды, иса шанш педатты навармам кем анта, симась лэпат сирн илды питмал сяссь!

– Я, ики, ёшңалдан педа вантыя!

Ёшңалад педа вантыйл: матты ки, пупи!

– Ловатэнан наңен ванты!

Матты ки, талаң тэдан пупия ювмал!

– Ин па, наң, ма педаем ванта. Мува талта сахат навармадам!

Ин икел навармас. Иса-а-а, нэмоқты вуш элды илды ювам маралн нюр пупи! Ид питас: кат ун пупи ики!

– Я хоты, молты вер уйтдан, ин муй верты мин тамиты йисман?

– Ики-лэ, ма муй вер уйтдам?

– Па муй уйтдан, ант уйтдан – мандаман!

Си, унта си шушапсаңан. Еша мантсаңан.


– Хоты, молты уйтдан?

– Ма муй уйтдам? Нэмоқты ант уйтдам!

– Талта елды мин ещадтэм хулам пупи этад! Муйкем артаң этлат, ид ханема! Ма лув пилэдан кутарматы питдам!

(Елды па ул)

Семён Михайлович
Лозьямов монсылдыс



Хорам, тащаң мувиев



Сикем хорам, умась муван муң улдув.
Шоши мувеван арсыр вонсямотат,
толхат, юхат, лыптит энамдат. Унтан
– войт, Асан худат улдат. Капщ тал
сыс лув сирэдан умась.

Талан – донсь одал, товийн – еңк
манал, тохдаң войт шоши мувева
ёхатдат. Луңан – худат, ар хорпи
вонсямот, толах, нохар, хорам лыптит.
Сусан – арсыр ольпаң юхат, тащаң
ведпасат.

Там мосванан верам хорат пондам.
Лопасан этадтам вонсямотат, лыптит,
торнат муң улты мувеван энамдат.
Сикем лув ольпаңат, эпдаңат, антом
па мув хорпи отат.

Альбина Тырлина ханшам потар



Хор: Альбина Тырлина

Газета «ДУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1340 Заказ 1348

Подписные индексы:
на год – ПА700, на полугодие – ПР561

№ 39 (1238)

Газета вышла в свет 28 сентября 2024г.
Подписано в печать 26 сентября 2024г.
по графику: 16.00
фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

Генеральный

директор
АНО «Ямал-Медиа»
Зулинова
Марья Андреевна

И.о. главного
редактора
Куртямова
Зоя Николаевна